

分類
古今筆記精華

文藝下

古今筆記精華錄卷十四下目錄

文藝

于肅愍臨刑詩

屈原歌

王越四時吟

韓翃詩

宋槧前後漢書

唐張繼楓橋夜泊詩

牡丹狀元

郭順貞獻詩保寨

虎林軍營倡和

陳其年贈雲郎詞

棲梧閣詩

延平女子題壁詩

序賦創格

緬蘭詞

芷崖詩句

秋燈詩

布囊焚餘

樾巢近體

首尾限字體

元微之崔鶯鶯商調蝶戀花詞

四婢娟

朝鮮女子詩

孩兒詩

黃九煙和楚女詩

黃九千春一恨集唐

解縉論作詩法

沙彌辨詩意

白居易詩目蓮救母

古人麗句

疊字詩

倒用成字

陳午亭說杜詩

李文貞說杜詩

蘇齋說杜詩

蘇齋說蘇詩

劉金門說杜詩

昌黎示兒詩

戴石屏奇對

劉後村書所見

龐石甫過汴京詩

文字紅裙

洪大全詞

弊俗新樂府

香奩八體

雨淋鶴

朱竹垞古人名對

巧對

宋人酒令

西廂酒籌

紅樓夢評語

燈謎

燈謎續錄

燈謎三錄

燈謎四錄

燈謎集唐詩

古今筆記精華錄卷十四下

文藝

于肅愍臨刑詩

余永麟北窗瑣語云故老相傳于肅愍公臨刑時謂刑者曰且停刀得完一詩云壯椿居士老維摩做盡人間好事多正統己添新歲月大明重整舊山河功過呂望扶周室德邁張良散楚歌顧我於今歸去也白雲堆裏笑呵呵及憶少時聞黃南崖先生言未嘗有詩但臨刑時云皇天后土可表此心者三四時有同刑都御史王文在側云斫頭就斫頭何用多言由此觀之不免畏死戰慄無從容就死之義肅愍剛大之氣小大可知豈至此而錯亂畏邪余終以黃崖之言為可疑

屈屈歌

北窗瑣語云江南一士人王姓未第時嘗設館吳下作屈屈歌以自嘆曰屈屈復屈屈仰天難訴乖造物人皆讀書多顯達何我讀書成抑鬱歎息吾年二八時優游學讀詩與書初心只說教書好誰知教書無了期人生百歲能幾何在家日少離日多春來倏忽赴東館歲暮欲還猶蹉跎今年已去復明年寒甑冷甕俱坐穿寂寞一飯小窗下冷落三杯孤燈前先生學問且莫論主人供膳難云云一願先生不嗜酒二願先生不茹葷先生更莫出門首出門唯恐招朋友人不覺尋訪來欲見主人如泄柳先生先生獨坐悶始得虛

名依本分有時散步舒精神主人遂為輕薄論愚頑之子功難成晨昏費盡千萬情河東
獅子反不足拊兒隔壁高聲爭先生教法纔放寬主人責備無交歡平天冠往市中買馮
驢缺向誰家彈不願主人廣讀書只願主人多富足先生雖讀萬卷書一字不堪瘡饑腹
物薄禮微為束脩受他便作無罪囚鳥不高飛遽入籠魚不遠躍輕吞鈎束脩况復多虛
花秕穀腐米如丹砂輸租償債兩無用此物如何能養家先生此屈何可當天覆地載空
昂昂青雲萬里在何處十年空對槐花黃高堂白髮缺甘旨貧賤糟糠歌屢屢白雲滿目
鴈南飛落日青山啼子規此恨綿綿怎生可此心錯用將奈何年年去教他家子自家兒
子誰琢磨七情縱不隨吾身五味亦且由他人誰能憫我度浙行誰能問我饑在陳男兒
立心期富貴縱得富貴當自致不遇常公薦馬周投筆西牕有何事安能不貴亦不富守
株待兔終不悞良辰美景夢中過賞心樂事愁邊度問君無學既無才胡不田園歸去來
明月空谷桂花香秋風江上芙蓉開問君有才既有學何不攀龍附鳳翼願麟閣上繪賢
圖鳳皇池上延上客問君二者俱不為囊琴挾劍將何之川原遠近多行樂漁樵耕牧俱
得宜且無榮貴亦無恥日月扁舟共妻子得魚沽酒醉復醒欸乃一聲烟波裡樵者莫憂
安與危利斧曉出行歌歸未雪先期隱薜蘿晴乾已得服茅茨田家有事在南畝畊饁朝
朝兩夫婦老子長孫足衣食頭白何曾識官府牧童有樂人未識卧牛背上游朝夕南村
北村煙雨歌三聲兩聲風月笛漁樵耕牧俱有樂不在天祿不在爵早知教書反不如絳

帳臯比盡拋却安得江上數畝田簞瓢陋巷三四椽布衣饘粥尚逍遙一家骨肉常團圓
先生先生王先生可憐三十名未成床頭金盡容憔悴風簷寸晷難留情東君東君且莫
屈先生素負英華質鸞鳳固非枳棘棲蛟龍豈是池中物何處可覓孟嘗君天下賓客徒
紛紛繆公無人子思側子思不能安其身屈屈歌屈屈歌寫不能盡情何多街頭紙價一
日貴墨池蘸盡春水波君不見鍾子期逢何遲高山流水誰能知又不見楊得意在何地
飄飄自負凌雲志先生自此永相別收拾清風與明月長揖主人出門去回首無勞再相
謁信知先生自有家何須落魄度年華教盡不遂平生志早期他業作生涯

王越四時吟

北窗瑣語云王都御史越以事謫戍湖南度地建亭書四時吟於其上曰我愛春春景好
山嘴吐晴煙牆頭戴芳草黃鸝罵杏花惹得游蜂惱海棠零落牡丹愁祇是韶光容易老
我愛夏夏日長玉戰棋聲碎羅翻扇影涼南薰買奇貨添得菱荷香蟬在綠槐深處鬧也
須回首顧螳螂我愛秋秋思苦黃菊憶陶潛征鴻怨蘇武黃葉落將來無風花自舞匆匆
社燕報歸期舊巢留作明年補我愛冬冬日閒烹茶落雪水倚杖看冰山莫唱塞邊曲將
軍夜度關若箇漁翁堪入畫一簑披得凍雲還美哉四時之景也吾何可以不樂乎朝五
斗暮百壺醉而醒醒又沽傍人道我好飲酒若我豈是真酒徒我也不荷劉伶鍾我也不
挑黃公壚我也不是奇男子我也不是賤丈夫用則兼善於天下舍則固守於窮廬聖賢

之訓乃如此不義富貴安足圖偶然吟罷發長嘆明月滿庭清興孤辭雖清麗而意則多怨望矣

韓翃詩

王士正分甘餘話云唐韓翃以春城無處不飛花一詩見知九重召知制誥傳為佳話世盡知之杜陽雜編又載一事德宗西幸有二馬一號神智驄一號如意驕貞觀三年蜀中進瑞鞭有麟鳳龜龍之形色類琥珀一日將幸諸苑內廐進瑞鞭上顧近臣曰昔朕西幸有二駿稱二絕今獲此鞭可稱三絕矣因吟曰鴛鴦赭白齒新齊曉日花間散碧蹄玉勒乍迴初噴沫金鞭欲下不成嘶亦翃作也知翃詩流聞禁中者多不獨寒食東風之句而已

宋槧前後漢書

分甘餘話云趙承旨家宋槧前後漢書王大司寇弇州得之陸水邨完家前有松雪小像後錢牧齋大宗伯以千二百金購之新安賈人復售於四明謝氏自跋云此書去我之日殊難為懷李後主去國聽教坊雜曲揮淚對宮娥一段淒涼景色約畧相似此書後又歸新鄉張司馬坦公康熙中有人携至京師索價甚高真定梁蒼崖大司馬酬以五百金不售携去後不知歸誰何矣

唐張繼楓橋夜泊詩

分廿餘話云唐張繼楓橋夜泊詩前人以夜半鐘聲為疑老學菴筆記引皇甫冉半夜隔山鐘于鄴詩遠鐘來半夜以為唐時僧寺或有半夜鐘不必姑蘇也墨莊云今平江城中自承天寺後改能仁寺半夜鳴鐘諸寺乃以次而鳴迨今如此蓋自唐而然據此則夜半鐘是姑蘇故事務觀亦未之考也

牡丹狀元

鈕琇觚賸續編云崇禎戊辰揚州鄭元勳集四方才士於影園賦黃牡丹詩推虞山錢宗伯為騷壇盟主品題羣咏最者賚以金疊番禺孝廉黎遂球下第南還亦與斯會即席成七律十章宗伯評置第一時號牡丹狀元其詩有月華蘸露扶仙掌粉汗更衣染御香又曰燕銜落蕊成金屋鳳蝕殘釵化寶胎皆麗句也而讀其全篇尚未盡體物之妙兼與揚州少切余因點筆題四韻於後聞道姚家種絕倫雕欄重見一枝新色分鶯羽迎風艷香染蜂鬚浥露勻小草豈能齊富貴羣花從此辨君臣碧簫聲裏紅橋畔金帶徒誇往日春

郭順貞獻詩保寨

鈕琇觚賸續編云戎馬盈郊干戈塞路當斯時也守土之臣建牙之將或係組而款迎或匿章而潛竄貽辱含污踵相接於世矣若夫智足保人辭能却敵魯仲連繫矢一書郭子儀立馬數語自古建今未易數見而况問之巾幗者流乎前朝俞指揮良輔南征入粵誅諸寨之未附者潮陽郭氏貞順從其夫周伯玉依溪頭寨俞兵將臨遠不數里貞順手製

長歌題為俞將軍引獻投麾下其詩曰將軍開國之勲臣蚤附鳳翼攀龍鱗烟雲慘淡蔽九野半夜捧出扶桑輪前年領兵下南粵眼底羣雄盡流血馬蹄帶得淮河水灑向江南作晴雪潮陽僻在南海濱十載不斷干戈塵客星移處萬里外天子亦念遐方民將軍高名亦千古五千健兒猛如虎輕裘緩轡踏地來不減襄陽晉羊祜此時特奉明主恩金印斗大龜龍紋大開藩衛制方面期以忠義酬高旻宣威布德民大悅把菜一笠誰敢奪黃犢春耕萬隴雲鷺龍夜卧千溪月去歲壺陽戍守時下車愛民如愛兒壺山蒼蒼壺水碧父老至今歌咏之欲為將軍紀勲績天家自有麒麟筆願屬壺民頌太平摩崖勒盡韓山石良輔覽詩大喜歛兵而回一寨得全貞順後與伯玉卜築偕隱壽至一百二十五歲洵乎閨幃奇傑亦詞翰雄才也

虎林軍營唱和

鈕琇觚賸云吳愧菴名炎潘力田名樞章才望相埒康熙癸卯二月同以史事株連逮繫虎林軍營吳有營中送春詩云一半春光縲紲過唾壺敲缺待如何鶯聲啼老聽難到柳絮飛殘撲轉多晚晚斜陽連雉堞朦朧短夢遶岩阿不堪往事成回首總付錢塘東逝波潘漫成四首其一抱膝年來學避名無端世網忽相嬰望門不敢同張儉割席應知愧管寧兩世先疇悲欲絕一家累卵杳難明自憐腐草同湮沒漫說雕蟲設此生其二吳關一路作羈縻棘木庭前聽五詞已分殘形輕似葉却憐衛足不如葵下堂真愧先賢訓抱壁

幾同楚客悲從平反能苟活他年應廢蓼莪詩其三園土初經二月春薰風又到繫維
身流螢夜度綈袍冷採薇朝供麥飯新敢望左驂歸越石還期長珮擬靈均多情最是他
鄉侶閒譜邇茲慰苦辛其四閱歷風霜祇自疑難將身世問時宜窮愁只合吾儕事姓氏
羞為獄吏知見說成書刑鑄鼎不聞有夢召胥靡南山此去躬耕好未可重題酒後詩吳
懷古四首咏岳忠武云將軍野戰最知名半壁河山一力撐義在春秋臣節殫法過韜畧
陣雲明運移宋曆終江海功就斬王敢弟兄痛飲黃龍千載恨錢塘夜夜有潮聲咏伍相
國云閭闔行歌未死身一言投契作宗臣報仇暮日忘荊國抉眼哀年看越人羅剎江頭
潮最怒姑蘇臺畔草常新蟲沙猿鶴無窮化願向波濤問大神咏蘇文忠云杭州刺史最
風流簫鼓樓船春復秋譏誚每櫻丞相怒判書常應老翁求六橋花柳蒙遺澤兩岸湖山
紀勝遊當日憐才豈無意峨嵋夜月照高丘咏于忠肅云開元城外黑雲屯土木營邊日
月昏手挾六龍羣喙定身擔一線國威尊戰爭有幾禁南牧繪幣無多返北轅兩字獄成
明主惜高名贏得並乾坤與美生對酌絕句云平生恨不學屠沽輸與高陽一酒徒此日
尊前須盡醉黃泉還有賣漿無是歲五月吳與潘俱磔於杭之弼教坊同死者二百餘人
先一日吳語其弟曰我輩必罹極刑血肉狼籍豈能辨識汝但視兩股上各有一火字者
即我尸也聞者無不流涕

陳其年贈雲郎詞

鈕琇觚賸云余所交海內三髯一為慈谿姜西溟一為邵陽康孟謨其一則陽羨生陳其年也其年未遇時遊於廣陵冒巢民愛其才延致梅花別墅有童名紫雲者儼麗善歌令其執役書堂生一見神移贈以佳句並圖其像裝為卷帙題曰雲郎小照適野梅盛開生偕紫雲徘徊於暗香疎影間巢民偶登內閣遙望見之忽佯怒呼二健僕縛紫雲去將加以杖生營救無策意極徬徨計唯得冒母片言方解此厄時已薄暮乃趨赴老宅前長跪門外啓門者曰陳某有急求太夫人發一玉音非蒙許諾某不起也因備言紫雲事頃之青衣媼出曰先生休矣巢民遵奉母命已不罪雲郎然必得先生咏梅絕句百首成於今夕仍送雲郎侍左右也生大喜攝衣而回篝燈濡墨苦吟達曙百咏既就亟書送巢民巢民讀之擊節笑遣雲郎其後紫雲配婦合卺有期矣生惘惘如失賦賀新郎贈之云小酌荼蘼釀喜今朝釵光鈿影燈前滉漾隔着屏風喧笑語報道雀翹初上又梢把檀奴偷相撲朔雌雄渾不辨但臨風私取春弓量送爾去揭鴛帳六年孤館相依傍最難忘紅氍毹畔淚花輕颺了爾一身花燭事宛轉婦隨夫唱努力做釵砧模樣只我羅衾渾似鐵擁桃笙難得紗牕亮休為我再惆悵此詞競傳人口聞者為之絕倒

棲梧閣詩

觚賸云桐城吳氏年二十五而寡以其所居有棲梧閣世遂稱為棲梧閣吳氏秉性高潔好讀歷代羣史而艷詞小說屏絕弗觀今聞其年六十有奇已屆梳雪之辰尚勤操觚之

業著有吟咏蒼古悲涼無脂粉氣若置之朱鳥集中又為閨閣另開一生面矣余於番禺宰姚公官署得金陵懷古詩八章錄其四而存之咏南齊云六貴同朝激虎彪橫江勒馬下雍州銀鎗酒市春雙靨玉屨蓮臺月半鈎趙鬼西京諳漢賦阿兄通閨壓東侯誰知講武旄頭入芳樂茄吹碧麝秋咏南梁云同泰齋中拜佛囉壽陽千騎渡江波金甌突向中原缺寶劍空嗔萬卷多五月誰勤君父難七官先反弟兄戈江淮廢後襄陽促秋草臺城放橐駝咏南陳云臨春閣上萬花妍寶帳朱簾裊蕙烟鼙鼓飛衝朱雀路軍書壓損繡牀邊嫦娥八月昏銀鏡狎客還家碎錦箋賸有景陽宮畔井胭脂春水咽殘絃咏南唐云江南一劍捲秋霜半壁山河入洛陽百尺樓空蓮葉碎翠微亭冷鳥聲荒臨城悽愴填宮曲辭廟倉皇聽教坊日夕淚痕誰洗面錦書封恨報紅粧

延平女子題壁詩

觚觿云郵亭旅舍好事者往往贗為巾幘之語書以媚筆以資過客傳誦多不足信沈公子二聞夜宿塚莊所見延平女子題壁詩騎塵未遠墨痕猶新小記短章悽惋可誦惜其依違寡斷閱者不無夫人少商量之歎也序云妾閩嶠名家延平著姓十三織素在家賦嬌女之詩二八結褵新婦獲參軍之配何異莫愁南國得嫁阿侯庶幾弄玉秦樓相逢蕭史方調琴瑟頓起干戈夫死於兵妾乃被掠含羞辭故里魂銷劍浦之津掩面疆登輿腸斷西陵之路茲當北上永隔南天爰題驛舍數言聊破愁城百疊嗟乎昔年薰香染翰粉

印青編今日滴血濡毫綃封紅淚秋墳鬼唱哀似峽猿三兩聲青塚魂歸恨擬胡笳十八
拍詩云野燒獵獵北風哀細馬斃車去不回紫玉青陵悵已矣泉臺當有望鄉臺那堪驛
舍又黃昏樺燭三條照淚痕想像延津沈故劍相期青塚一歸魂昨夜嚴親入夢來教兒
忍死暫徘徊曹瞞死後交情薄誰把文姬贖得回不道臨時死亦難強為歡笑淚偷彈同
行女伴新梳裹皂帕蒙頭壓繡鞍後書庚申季秋延平張氏題於沂水縣垛莊驛舍

序賦創格

觚觶云陳鶴客三島長洲人崇禎末為博士弟子有聲國初晦迹授徒然故國黍離之感
不去於懷終以憂憤成疾年三十有四而卒曾為余內兄畢西臨作當泣草序曰畢子西
臨以終生上策之年懷太傅度湘之志被明月於江臯爰歌九辨悲雨雪於阪道兼作四
愁乃示予以詩其自命曰當泣草噫嘻悲夫仙人羽蓋望姑射以何歸帝子霓旌仰橋山
而莫及玉泉河畔水漲桃花銅馬門前風吹秀麥故府久為拜月之庭行宮竟作祭天之
宅朝圍獵騎萬里揚沙暮起尸歌九門落日西山草綠誰傳社飯於諸陵北殿貂黃徒思
臘酒於故闕逢荆卿之故友相對生悲登樂毅之空臺自然飲泣若夫道指金陵客歸江
表風景蕭條河山綿邈金鳬銀雁盡出人間細柳新蒲悲從父老鳳凰臺上朝來麋鹿之
遊鵲鵲觀前夕作牛羊之道劉琨既逝嘯未舉而樓空祖逖云亡鷄既鳴而天曉山中公
子誰共攀夫桂樹道上王孫獨自尋夫芳草遂乃下雲陽登石屋望遠則目屬青龍臨空

則悲生黃鵠彈箏拊筑傭工歌變徵之聲短笛橫簫乞食吹小海之曲華屋增羊子之悲窮途起阮公之哭於是駕雲螭乘白霓王良為御造父前驅巫咸申命詹尹陳辭遠遊誰去歲舉何之橫四海其焉極望夫君而太息弔玉米於江陵奠椒漿於太乙鳳吹寂寞空存雲母之山鸞蓋飄零徒憶辛君之邑僊城飛鶴懷往日以悲鳴蜀道啼鵲見故家而飲血浮雲白帝之鄉羽旗何處細草黃陵之廟珮聲俱沒斯則懷古思今悲從中起表松柏於林間不獨齊君歌鳥鳶於江上寧唯越子乘犢過翟義之臺咸歌薤露執紼拜田橫之墓盡唱萬里聞者無不心傷見者為之髮指然則人壽幾何河清難俟問道則路無朱燭寄書則江無赤鯉候旭日於成山文鳥不來望飛雲於海曲青羊莫止錦江彩石信窮河漢之槎金馬碧鷄日斷岫嶼之使所以仲連絕迹於海濱伯鸞息影於吳市莊舄之思越國哀感旁人鍾儀之操南音情惟故主萱草非可忘憂荼苦其如甘旨嗟乎世修曼以多艱心悵悵而永歎往路憂多焉得化蛻於嬰弟來日苦少不逢斟難於彭錢悠悠蒼天其已焉哉乃為之歌曰上有漢兮雲漫漫望北斗兮不能攀舒長嘯兮心未安感皇穹兮獨無言歌既闕畢子泣數行下而去詩序以賦體用韻此為創見又有賦而全不用韻別創一格如南村先生病賦皆極文心之奇變不斤斤摹古求工者也賦曰人之生也如天之風如水之漪如耳之鳴如駟之驟如巫之祝如蟋蟀之躋如燈之葩如蜃如沸如冰如烟如鐵之出於火入於水如露如花如富家兒如仕如觀史如樂如御宮女如月之魄如夜

之旦如旦之晝如晝之夜如交如問途如咒如鄒魯閨如財如戰如聚如笑如男女合如
魔如兒言如婚如君臣如蠶如白雲如黃雲如黑雲如青雲如雷如爆如仙如佛如霰如
醉如老生之講學如弟子之從師如佞如蒞如盜如雲之出於山歸於山如水之洩於山
蓄於山如優如博而其死也幽幽爾荒荒爾遽遽爾沈沈爾冲冲爾墨墨爾而水然而夜
然而石然而槁然而客之歸然而草之秋然而冰之漸然而偶然而塊然而角然而銅錫
金壁種種然而瓦礫甕缶種種然而楹桷柱牖種種然而矛及鉞戟種種然而脛然而背
然而愚然而瘖然而其生未極死未及也而鬼為之崇而人為之崇而寒為之崇而暑為
之崇而風為之崇而日為之崇而飲食為之崇而仁為之崇而義為之崇而醫為之崇而
巫為之崇而其耳也與天通不然胡雷而其目也與林通不然胡花而其鼻也與魚鼈通
不然胡腥而其舌也與道人通不然胡鐸而其髮也與狐通不然胡氈而其髯也與秋通
不然胡凋而其腹也與軍通不然胡戰而其膽也與大將通不然胡怖而其心也與繅通
不然胡繁而其背也與山通不然胡石而其尻也與朝士之口通不然胡結而其溺也與
斧通不然胡割而其膝也與弩通不然胡勁而其股與足也與金通不然胡沈堅而不能
舉而生也而死也而非生也而非死也而或生也而或死也而未生也而未死也而生忘
其為生也死忘其為死也而病也